

China the Beautiful 錦繡中華之一頁 裴明龍編

孝經 Xiao Jing []

Book of Filial Piety

By 孔子 Confucius

孝經

- [1] 開宗明義章
- [2] 天子章
- [3] 諸侯章
- [4] 卿大夫章
- [5] 士章
- [6] 庶人章
- [7] 三才章
- [8] 孝治章
- [9] 聖治章
- [10] 紀孝行章
- [11] 五刑章
- 廣要道章
- [12] 廣至德章
- [13] 廣揚名章
- [14] 諫諍章
- [15] 感應章
- [16] 事君章
- [17] 喪親章

[1] 開宗明義章第一

仲尼居·曾子侍·子曰·先王有至德要道·以順天下·民用和睦·上下無怨·汝知之乎·曾子避席曰·參不敏·何足以知之·子曰·夫孝·德之本也·教之所由生也·復坐·吾語汝·身體髮膚·受之父母·不敢毀傷·孝之始也·立身行道·揚名於後世·以顯父母·孝之終也·夫孝·始於事親·中於事君·終於立身·大雅云·無念爾祖·聿脩厥德·

[2] 天子章第二

子曰·愛親者·不敢惡於人·敬親者·不敢慢於人·愛敬盡於事親·而德教加於百姓·刑于四海·蓋天子之孝也·甫刑云·一人有慶·兆民賴之·

[3] 諸侯章第三

在上不驕·高而不危·制節謹度·滿而不溢·高而不危·所以長守貴也·滿而不溢·所以長守富也·富貴不離其身·然後能保其社稷·而和其民人·蓋諸侯之孝也·詩云·戰戰兢兢·如臨深淵·如履薄冰·

[4] 卿大夫章第四

非先王之法服不敢服·非先王之法言不敢道·非先王之德行不敢行·是故·非法不言·非道不行·口無擇言·身無擇行·言滿天下·無口過·行滿天下·無怨惡·三者備矣·然後能守其宗廟·蓋卿大夫之孝也·詩云·夙夜匪懈·以事一人·

[5] 士章第五

資於事父以事母而愛同·資於事父以事君而敬同·故母取其愛·而君取其敬·兼之者父也·故以孝事君則忠·以敬事長則順·忠順不失·以事其上·然後能保其祿位·而守其祭祀·蓋士之孝也·詩云·夙興夜寐·無忝爾所生·

[6] 庶人章第六

用天之道·分地之利·謹身節用·以養父母·此庶人之孝也·故自天子至於庶人·孝無終始·而患不及者·未之有也·

[7] 三才章第七

曾子曰·甚哉·孝之大也·子曰·夫孝·天之經也·地之義也·民之行也·天地之經而民是則之·則天之明·因地之利·以順天下·是以其教不肅而成·其政不嚴而治·先王見教之可以化民也·是故先之以博愛·而民莫遺其親·陳之於德義·而民興行·先之以敬讓·而民不爭·導之以禮樂·而民和睦·示之以好惡·而民知禁·詩云·赫赫師尹·民具爾瞻·

[8] 孝治章第八

子曰·昔者明王之以孝治天下也·不敢遺小國之臣·而況於公侯伯子男乎·故得萬國之歡心·以事其先王·治國者·不敢侮於鰥寡·而況於士民乎·故得百姓之歡心·以事其先君·治家者·不敢失於臣妾·而況於妻子乎·故得人之歡心·以事其親·夫然·故生則親安之·祭則鬼享之·是以天下和平·災害不生·禍亂不作·故明王之以孝治天下也如此·詩云·有覺德行·四國順之·

[9] 聖治章第九

曾子曰·敢問聖人之德無以加於孝乎·子曰·天地之性·人爲貴·人之行·莫大於孝·孝莫大於嚴父·嚴父莫大於配天·則周公其人也·昔者周公郊祀后稷以配天·宗祀文王於明堂·以配上帝·是以四海之內·各以其職來祭·夫聖人之德·又何以加於孝乎·故親生之膝下·以養父母曰嚴·聖人因嚴以教敬·因親以教愛·聖人之教不肅而成·其政不嚴而治·其所因者本也·父子之道·天性也·君臣之義也·父母生之·續莫大焉·君親臨之·厚莫重焉·故不愛其親而愛他人者·謂之悖德·不敬其親而敬他人者·謂之悖禮·以順則逆·民無則焉·不在於善·而皆在於凶德·雖得之·君子不貴也·君子則不然·言思可道·行思可樂·德義可尊·作事可法·容止可觀·進退可度·以臨其民·是以其民畏而愛之·則而象之·故能成其德教·而行其政令·詩云·淑人君子·其儀不忒·

[10] 紀孝行章第十

子曰·孝子之事親也·居則致其敬·養則致其樂·病則致其憂·喪則致其哀·祭則致其嚴·五者備矣·然後能事親·事親者·居上不驕·爲下不亂·在醜不爭·居上而驕則亡·爲下而亂則刑·在醜而爭則兵·三者不除·雖日用三牲之養·猶爲不孝也·

[11] 五刑章第十一

子曰·五刑之屬三千·而罪莫大於不孝·要君者無上·非聖人者無法·非孝者無親·此大亂之道也·

[12] 廣要道章第十二

子曰·教民親愛·莫善於孝·教民禮順·莫善於悌·移風易俗·莫善於樂·安上治民·莫善於禮·禮者·敬而已矣·故敬其父·則子悅·敬其兄·則弟悅·敬其君·則臣悅·敬一人·而千萬人悅·所敬者寡·而悅者眾·此之謂要道也·

[13] 廣至德章第十三

子曰·君子之教以孝也·非家至而日見之也·教以孝·所以敬天下之爲人父者也·教以悌·所以敬天下之爲人兄者也·教以臣·所以敬天下之爲人君者也·詩云·愷悌君子·民之父母·非至德·其孰能順民如此其大者乎·

[14] 廣揚名章第十四

子曰·君子之事親孝·故忠可移於君·事兄悌·故順可移於長·居家理·故治可移於官·是以行成於內·而名立於後世矣·

[15] 諫諍章第十五

曾子曰·若夫慈愛恭敬·安親揚名·則聞命矣·敢問子從父之令·可謂孝乎·子曰·是何言與·是何言與·昔者天子有爭臣七人·雖無道·不失其天下·諸侯有爭臣五人·雖無道·不失其國·大夫有爭臣三人·雖無道·不失其家·士有爭友·則身雖不離於令名·父有爭子·則身不陷於不義·故當不義·則子不可以不爭於父·臣不可以不爭於君·故當不義·則爭之·從父之令·又焉得爲孝乎·

[16] 感應章第十六

子曰·昔者明王·事父孝·故事天明·事母孝·故事地察·長幼順·故上下治·天地明察·神明彰矣·故雖天子必有尊也·言有父也·必有先也·言有兄也·宗廟致敬·不忘親也·脩身慎行·恐辱先也·宗廟致敬·鬼神著矣·孝悌之至·通於神明·光于四海·無所不通·詩云·自西自東·自南自北·無思不服·

[17] 事君章第十七

子曰·君子之事上也·進思盡忠·退思補過·將順其美·匡救其惡·故上下能相親也·詩云·心乎愛矣·遐不謂矣·中心藏之·何日忘之·

[18] 喪親章第十八

子曰·孝子之喪親也·哭不偯·禮無容·言不文·服美不安·聞樂不樂·食旨不甘·此哀戚之情也·三日而食·教民無以死傷生·毀不滅性·此聖人之政也·喪不過三年·示民有終也·爲之棺槨衣衾而舉之·陳其簠簋而哀感之·擗踊哭泣·哀以送之·卜其宅兆·而安措之·爲之宗廟·以鬼享之·春秋祭祀·以時思之·生事愛敬·死事哀感·生民之本盡矣·死生之義備矣·孝子之事親終矣·

孝經終